

Wasika-à Bulus Ba Ya Sig Mpìrká Mà FILIBI

Bulus yag mà Filibi n dang jir àjwár á shinn Yesu Kristi ni (Swàm Yann 16). Mpìrká káhi bir pìkyinn áni. Mpìrká zyun-à bir sig pìkyinn áni níng, big í àsàinká bir jag sig pìkyinn á byar Yesu mà agunn jànn Makidoniya. Big ri dwim ya kyann Bulus bàì á sai-à ku ri kyann mi ri dang jir àjwár-à á shinn Yesu ni, jirà aku dìg bu-à kwá pànn kwonn ma kàhi á kyonnwá ni. Bulus ba sig wasika-à níng n sa ya big ísoko jir bàiká big ya sig ku. Ku dinya big rag abig shi àràg barà Yesu shi sig, abig sa sunu bu-à bibai bàna. Ku tìya big barà Shìdun ri ya àjwár ma pìkyinn na tag á byar mpìrká zyun-à ri bàg Yesu Kristi.

¹ I mì Bulus ma Timoti, yi ká ri sa swàm Yesu Kristi, mì ri ba ya ning, ning mpìrká á finn swann Filibi, ningká zyun-à ning í mpìrká bu Shìdun á jir barà ning ri bàg Yesu Kristi, ma àgbam iklisiyaká ma dikonká tinn.

² Shìdun Tayí ma Shinn Luyí Yesu Kristi abig wir kà ya ning àsàn ma pìkyinn na tag.

Bulus Vig Shìdun á Shinn Mpìrká Ri Bàg Yesu Kristi á Finn Swann Filibi

³ Mì ri sa ya Shìdun ísoko sai-à ma kyab pànn hing ning kó ákaun bidìm pár.

⁴ Kó ákaun sai-à ma vig Shìdun á shinn ná ni, mì ri vig ma pìkyinn àjwár.

⁵ Mì ri sa àdòníng dò jir shinn barà ning rì sa shang sig mì swàm jir àjwár-à níng áni, daka sai-à rì hár bi fòr tàma-à níng.

⁶ N yì hing Shìdun àsàin-à sa jag sig swàm sisàn á pìkyinn ná ni níng, kwá sa kyann swàmwá hár sái àyúnn-à Yesu Kristi má kàng bi áni.

⁷ Mì ri myàng, sànn hing n kyab àdòníng, jir kai bàna mì ri kyab pànn kyann ning á pìkyinnmí ni, barà ning sa shang hing mì á swàm jir àjwár-à níng ni. Sai-à big kíg kà mì á tonn fi-à ni, ning sa shang hing mì, sai-à mì ri tàg mpìrká rag jir Yesu í àjai abig bir pìkyinn áni níng, ning sa shang hing mì.

⁸ Mì ri zìm ning wàni àràg barà Yesu Kristi ri zìm ning níng. Shìdun yì hing bu-à mì ri dang níng í àjai.

⁹ Mì ri vig Shìdun rag aning zìm swàb kà mpìrká, ma aning díg swàb kà yar, ma aning yì barà ná gáfinn bu-à sisàn ma bu-à bibai,

¹⁰ jirà aning shig zu bu-à sisàn. I wà ná shi mpìr pìkyinn-à kyìkyà, jirà àyúnn-à Yesu Kristi má kàng bi hing, kwá díg fig ning ma bu-à bibai bàna.

¹¹ I wà Yesu Kristi ku awínwá ni kwá sa ning ná shi mpìr sisàn á buká ná sa bidim pár. Wà na shi hing mpìr nsàn, mpìrká má swam yan Shìdun.

Bulus Shi Sig Shu Yesu Kristi

¹² Wunzámí big, mì ri zìm aning yì rag buká díg sig mì níng, sa jir Shìdun yag rìghing mà pyànn.

13 Sojaká ri sar gadi á lu kùr-à ni, ma mpìrká bidìm pàr yì hing rag big sùr sig mì á jir shinn Kristi.

14 Barà big kìg sig mì mà tonn fi-à ni níng sa mpìrká ri bàg Yesu Kristi níng bir swàb kà pìkyinnbá, hár mi ri wim kyinn, mi ri dang swàb kà jir Shìdun, zinn bàna.

15 Káhi ri sa akyib mi ri dang jir Kristi dò jirà jàubá ri dang. Ama káhi ri dang ma pìkyinn-à mìmìg.

16 I ká ri zìm mì. Big yì hing Shìdun sinn sig mì jirà ñ dinya mpìrká jir àjwárwá.

17 Káhi ri dang fig jir Kristi ma pìkyinn ñzyun bàna, big ri zìm shinnbá. Big ri zìm abig swàb kà ya mì shwìn, barà ñ shi sig mà tonn fi-à ni.

18 Mì ri myàng, bai fig bàna, mì ri fig àjwár wà ba ri dang jir Yesu Kristi kó áni bidìm pàr. Kó ba dang jir Kristi ma pìkyinn-à mìmìg, kó ma pìkyinn-à mìmìg bàna, mì ri fig àjwár.

19 N yì hing bá zìg zu rìg mì, jir kai bàna ning ri vig Shìdun á shinnmí ni. Awun Yesu Kristi ri sa shang mì tinn.

20 Bu-à mì ri sa àtùtwài á pìkyinnmí ni bàna, kó ákaun mì ri zìm ñ sa bu-à Yesu Kristi ri zìm. Mì ri zìm ñ wim kyinn tàma-à níng àràg wàri, jirà ñ sar gbam á swàm Kristi ni, jirà abig swam yan ku, kó ma shi sig ma yonki, kó ma wu rìghing.

21 Bu-à sinn sig mì ñ shi sig níng, mì ri shi shu Kristi. Kó ma wu hing, sànn hing.

22 Wà ma shi hing ma yonki á jànn-à ni, ma sa shang mpìrká. Wà ñ nìm má shig zu sar, ñ shig

zu wà áni rà? N shi á jànn-à ni rà, kó n shi mà wai rà? Ama n yì fig bàna.

²³ N wà sig jír pyànà á kyinnmí ni, mì ri zìm n fim dunyaru-à níng, n shi ma Kristi, wà zyun-à kab sig bu dunyaru bidim pár.

²⁴ Ama á dò jir shinn ná ni, sànn kab sig n shi ma ning ma yonki,

²⁵ jir kai bàna n yì hing má shi ma yonki, àjirà n sa shang ning, aning bir swàb kà pìkyinn ná, ma àjirà aning fig àjwár.

²⁶ Wà ma bi hing á byarná ni, ná fig àjwár wàni á jir shinnmí ni, barà ning ri bàg Yesu Kristi níng.

²⁷ Bu-à mì ri zìm á byarná ni, aning shi shuná àràg barà jir àjwár á shinn Kristi ni dang sig, jirà kó yi ma ning ma shi sig í zyun, kó ma shi sig byar pyunn ninonn, má yì rag nuná nzyun, ning ri sar gbam, ning ri dang tir mpìrká á jir Shìdun.

²⁸ Aning shàr zinn mpìrká ri zib ning bàna, aning wim kyann pìkyinn. Wà na sa hing àdòníng, bá yì rag ná wim zu, ama bigbá bá wim zu fig bàna, jir kai bàna í Shìdun ri yá ning gbam-à nì.

²⁹ Big ya fig ning gbam jirà aning bir íri pìkyinn á byar Kristi ni átai bàna, ama jirà aning wa shwìn á shinnwá ni tinn.

³⁰ Sai-à yì ma ning shi sig zyun, ning myàng hing shwìnká n wa sig. Ning ri fig swai shwìn-à mì ri wa hár tàma-à níng. Ning ma shinn ná, ning ri wa íri swai shwìn-à mì ri wa.

2

Barà Yesu Sìnn Kàng Shinnwá á Sim

¹ Pìkyinn birná á byar Kristi ni, ri sa ning ning ri dìg gbam rà? Azìmwá fòr hing á byarná ni rà? Ning ri jùn kwonn ma Awunwá rà? Ning ri zìm mpìr, mi ri myàng ashibá tinn rà?

² Wà má àdòning, aning sa ya mì bu zyun. Aning shí bu ñzyun. Aning zìm bar òrná. Bu-à na ri kyab aku shí bu ñzyun. Bu-à na ri zìm á pìkyinn ná ni aku shí bu ñzyun.

³ Aning sa bu-à ná zìm íri shinn ná bàna. Aning gbar dù shinn bàna. Aning wib mpìr, kada aning kyab rag ning kab mpìr zyun bàna.

⁴ Kada kó ni aku kyab íri bu-à kyinnwá ri zìm bàna. Ama aku kyab bu-à jàuwá big má zìm tinn.

⁵ Pìkyinn ná aku shi àràg bu Yesu Kristi:

⁶ Ku shi sig àràg í Shìdun.

Ama ku sìnn kàng fig shinnwá rag ku ma Shìdun màg sig ábibir bàna.

⁷ Ku sìnn kàng rìg shinnwá á sim àràg ku í bu zyun bàna.

Ku sìnn kàng shinnwá àràg ku í fàu.

Ku sìnn kàng shinnwá àràg ku í mpìr jíkwìnn.

⁸ Ku sìnn kàng shinnwá á sim.

Ku wib Shìdun hár n zìm aku wu ki.

Ku wu ki átàm bín-à ni.

⁹ Jir wàning, í bu-à sa Shìdun gbar dù ku n ya ku gbam,

n ya ku zìnn zyun-à kab sig zìnnká kádà,

¹⁰ jirà mpìrká bidìm pár abig bìnn kir wann abig wib zìnn Yesu,

mpìrká mà wai ma mpìrká á jìnn ni, ma kó áni bidìm pàr.

¹¹ Mpìrká bidìm pàr má dang rag, Yesu Kristi í Asàin Lu.

Bá dang àdòníng má swam yan Tayí Shìdun mà wai.

Aning Mìg Ayau Mpìrká Ni Aràg í Asuswirká Ri Mìg Mà Wai

¹² Ayormí big, ká mì ri zìm, barà ning rì wib sig jírmí sai-à yi ma ning rì shi síg zyun níng, barà tàma-à níng ò bàna mà byarná ni níng, má sàan aning wib jírmí wàni. Aning shi sa bu-à sèsàn. Aning wib Shìdun ma aning shàr ku jirà aku pinn zu ning hár kinn kinn.

¹³ Shìdun í àsàin-à ri sènn kà ning jirà aning zìm wà ná sa bu-à ku ri zìm. Ku í àsàin-à ri ya ning gban jirà aning sa bu-à ku ri zìm.

¹⁴ Bu-à na sa bidìm pàr, aning yàng dang jír bàna, aning gbìb shùr bàna tinn,

¹⁵ jirà kada mpìrká abig dang rag ning mpìr asa bu-à bibai bàna, jirà aning shi yanká sèsàn á pyànn Shìdun. Ning shi kwonn sig ma mpìrká ri sa bu-à bibai á jànn-à ni. Aning mìg áyaubá ni àràng barà asuswirká ri mìg mà waisháu-à ni,

¹⁶ á sai-à na dinya big jir Shìdun zyun-à ri ya yonki. Wà na sa hing àdòníng, wàníng má tàg rag swammí ò sa sig áyauná ni níng, í swàm átai bàna. Wà má àdòníng má fig àjwár àyúnn-à Kristi ma kàng bi hing.

¹⁷ Ning yì sig Shìdun á jir shinnmí ni. Kó big nìm ma gban mì á dò jir barà ning bir sig pìkyinn

ná á byar Yesu, n nìm má fig àjwár ma ning á dò jir shinn barà ning bir sig pìkyinn.

¹⁸ Ning tinn má, aning fig àjwár, ayi ma ning fig àjwár àbìr-à ni.

Swàm Timoti Ma Abafaroditas

¹⁹ Wà Shinn Luyí Yesu ma zìm hing, mì ri zìm ñ tìr ya yag ning Timoti, jirà wà ma fig hing tai á shinn ná ni má fig àjwár.

²⁰ N bàna ma mpìr zyun-à shi sig ma pìkyinn-à sisàn àràg ku, zyun-à má myàng kwonn ma ning.

²¹ Kó ni bidìm pàr ri kyab íri jir shinnwá, í jir shinn bu Yesu Kristi bàna.

²² Timoti shi fig àràg mpìrká kádà níng bàna. Sai-à yì ma ku ri dang kyann jir àjwár, ku ri sa swàm wàni. Yì ma ku shi sig àràg í ta ma wùn.

²³ I bu-à sa ò rag má swam yag ku á byarná ni kíni, ama sái ma myàng byann hing bu-à má sa mì.

²⁴ Mì má mì ri bir pìkyinnmí á byar Kristi ni rag, mì ma shinnmí má òg pyù-à má bi á byarná ni, má nonn fig bàna.

²⁵ Mì ri kyab sànn hing ñ swam kàng ya bi ning Abafaroditas wunzàmí zyun-à ning swam bi sig aku sa shang mì. Yì ma ku dab kar sig swàm Shìdun í zyun.

²⁶ Ku ri wìm á kyinnwá ni aku bi myàng ning. Pìkyinnwá gib, jir kai bàna ku yì hing ning fig hing tai dorwá.

²⁷ Ajai ku rì í òr wa. Shi shirag kwá wu rìg. Ama Shìdun myàng hing ashiwá, n myàng hing

ashimí tinn, n dàb gbam rìghing ku, jirà kada a shwìn mí wài bàna.

²⁸ I bu-à sa ò dang rag sà n hìng ò tìr yag ku á byarná ni, jirà aning fig àjwár wà na myàng kàng hìng ku, àjirà pìkyinn mí aku na tag.

²⁹ Aning shà ku, aning pànn ku vù pyà nà àràng ku í wunzà nà á jir shinn Yesu Kristi, aning wib ìrì swai mpìr àdò nìng.

³⁰ Bu-à sa nìng, ku wann tafinn hìng shinnwá á jir shinn swàm Kristi, ku wu rìg dà hìng. Ku sa shang hìng mì, jir kai bàna bigná ning sa sar fig bàna.

3

Bu-à Má Sìn Kàng Yi Ayi Shi Mpìr Sìsàn á Pyàn Shìdun, í Pìkyinn Bir á Byar Yesu

¹ Wà kinn shinn-à, wunzà mí big, aning fig àjwár ma Shinn Luyí. Barà mì ri ba ya jakàng ning bu-à ò rì ba rìghing nìng, amyàng mí ni bai fig bàna, jir kai bàna í bu-à má sà n ya ning.

² Aning pànn shinn ná ma mpìrká ri sa bu-à bibai. Big shi sig àràng í bá i. Big dang rag, mpìr ma kyag fig jur bàna, kwá dìg fig yonki bàna.

³ Yi í àsàinká ri wib Shìdun ma pìkyinn ò zyun. Wà nìng í jur kyag-à wà Shìdun ri zìm, jir kai bàna Awunwá ri tàg yi á pìkyinn yí ni ayi wib ku. Yi ri fig àjwár ma shuyí áyau gbìb Yesu Kristi. Yi ri sìn fig pìkyinn yí á òr bu zyun ni rag kwá pinn zu yi bàna.

⁴ Wà yi nìm ma ri sa àdò nìng, mì má, ò nìm má sìn kyinn mí á òr bu zyun ni rag bu-à hi má pinn zu mì. Wà mpìr zyun ma ri kyab rag

wà kwa sinn kà hing kyinnwá á buká ku ri sa, í wà kwá wìm zu íni, mì má sai-à rì níng ò sa kab hing àdòning.

⁵ Asai-à big mà mì, sumí awinyin big kyag jurmí. Big mà sig mì á nu jir Israila. Mì í swai mpìr Benjamin. Mì í swai mpìr Ibraniyaká, mì í Farisa, sai-à rì níng ò wib hing doka Shìdun wàni àràg barà Farisawaká ri wib níng.

⁶ N rì fig àjwár wàni wà ma gban hing mpìrká ri bàg Yesu. N wà sig rag, mì ri wib Shìdun. Wà mpìr nìm ma wib hing doka Shìdun ma shi hing mpìr òsàn, mpìr-à níng hi nìm má shi í mì.

⁷ Buká mì ri myàng sai-à rì níng rag í bu ùwài níng, tàma-à níng barà ò yì rag Kristi níng, ò sinn kàng rìghing bu káníng í bu zyun bàna.

⁸ Barà ò yì rag Yesu Kristi níng, ò sinn kàng rìghing kó kai bidim pár í bu zyun bàna, jir kai bàna gbìb Yesu yì kab sig ò kó kai bidim pár. N sinn kàng rìghing kó kai bidim pár àràg buká big ri kifinn mà kwìm yinn-à ni jirà ò dèg Kristi,

⁹ ma ò jùn kwonn ma Kristi. N yì hing íri doka Shìdun wib má sinn kàng fig yi mpìr òsàn á pyànn Shìdun bàna. Ama sai wà ya bir hing pìkyinnyí á byar Kristi í wà kwá zìg zu yi. Shìdun má sinn yi ayi shi mpìr sèsàn wà ya bir hing pìkyinnyí á byar Kristi.

¹⁰ Bu-à mì ri zìm bàna, mì ri zìm ò yì Kristi ma gban-à gbar dù nann zu sig ku mà amir-à ni. Mì ri zìm ò wa shwìn á dò jir shinnwá ni àràg barà ku wa sig. Mì ri zìm ò wu á dò jir shinnwá ni àràg barà ku wu sig.

¹¹ Mì má, ò sinn sig á pìkyinnmí rag ma wu

hing, má dù kàng ma yonki tinn.

Ayi Yag Mà Pyànn Ma Wà Bàg Buká Shìdun Tàg Sig Yi

¹² N zìm fig wà ñ rag ò fòr hing bu zyun bàna. N fòr fig ma bu-à Kristi ri zìm ñ fòr níng bàna. Ama mì ri yag mà pyànn mà pyànn, jirà ñ fòr bu-à Yesu Kristi zyun-à zìg zu sig mì níng, ri zìm ñ fòr.

¹³ Wunzàmí big, ò yì hing ò fòr fig ma bàna. Ama mì ri zìm ñ mà m jànn rìg wà ásim, ñ kyab wà mà pyànn, barà má fòr bu-à Yesu Kristi ri zìm ñ fòr.

¹⁴ Mì ri yag mà pyànn mà pyànn, jirà ñ dìg yonki àpyú zyun-à mà wai wà Shìdun gib sig nu rag kwá ya mpìrká á jir shinn Yesu Kristi.

¹⁵ Yi mpìrká yi pànn gbam sig jir Shìdun á pìkyinnyí ni níng, ayi kyab àdòning tinn. Wà mpìrká káhi áyauná ni ma ri kyab bubá kim, Shìdun má tiya byann big jirà abig yì.

¹⁶ Ayi yag mà pyànn mà pyànn àràg barà yi rì bàg jag sig buká Shìdun tàg sig yi níng.

¹⁷ Wunzàmí big, aning shi shuná àràg barà mì Bulus mì ri shi níng. Aning myàng shu mpìrká ri bàg mì níng, big ri shi shu òsàn àràg barà mì ri shi.

¹⁸ Mpìrká nìnànn nímá dang rag big ri bàg Kristi, ama big í mpìr azib Kristi àsàin-à wu sig mà atàm bìn-à ni. N dinya rìghing ning bu káníng tun daka á ninonn, tàma-à níng mì ri dinya ning hár ma zàn mínn.

¹⁹ Mpìr káníng má kà pyìr, jir kai bàna bu-à big ri zìm á pìkyinnbá ni big sìnn sig àràg í Shìdun.

Big ri gbar dù shinn á shinn bu-à big nìm ma fig zunáí áni. Big ri kyab íri bu dunyarú.

²⁰ Ama buyí, finn swannyí shi sig mà wai. Yi ri sa àtùtwài mi ri shi kir àyúnn-à Yesu Kristi má wann bi mà wai, ku zyun-à kwá zìg zu yi níng.

²¹ Kwá vim bìr rìg dìryí zyun-à bàna ma gbam, kwá ya yi òr àpyú àràg òr wá, zyun-à í òr sisàn. Kwá vim bìr rìg dìryí ma gbamwá zyun-à ku shi sig ma kàhi wà zyun-à kwá sìnn kàng kó kai bidìm pàr má shi á mìr barwá ni.

4

Aning Fig Ajwár á Byar Kristi

¹ Ning wunzámí big ká mì ri zìm wàni, mì ri zìm ñ myàng ning kó ákaun. Ning ká zyun-à mì ri fig àjwárná, mì ri swam yan kyann ning. Aning sar gbam á gbìb Shinn Luyí ni.

² Mì ri dang jír ma uwà pyànà, Afodiya ma Sintiki, mì ri vig big abig jùn kwonn kàng, ma abig zìm bar òr bá á zìnn Shinn Luyí Kristi.

³ To, ayormí, mì ri zìm á sa shang uwà káníng, jir kai bàna big wa shang hing mì shwìn á dò shinn swàm jir àjwár kwonn ma Kiliment ma mpìrká yi ma big ri sa swàm í zyun, ká big ba kà sig zìnnbá á tarkada yonki.

⁴ Aning fig àjwár kó ákaun áyau shuná barà ning ri bàg Shinn Luyí Kristi, mì ri dinya jakàng ning rag, aning fig àjwár.

⁵ Aning tìya kó ni bidìm pàr pìkyinn ajun, jir kai bàna ning yì hing Shinn Luyí nyàan kàng bi.

⁶ Kada aning wor awor á shinn bu zyun ni bàna, ama bu-à na ri zìm bidìm pár aning vig Shìdun, aning sa kyann ku ísoko.

⁷ I wà Shìdun má ya ning pìkyinn na tag, zyun-à kab gbam wà mpìrká má yì. Pìkyinn na tag-à níng má sa pìkyinn ná má shi sèsàn á gbìb Yesu Kristi.

⁸ Wà kinn shinn-à mì ri zìm aning kyab buká òsàn á pìkyinn ná ni, wà má jwar ya mpìrká, àràg bu á gbìb àjai, kyinn òsàn, bu òsàn sa, shu kyìkyàr, shu azìm, ma bu-à mpìr má yan.

⁹ Aning shi sa buká ning shwann sig á byarmí ni, buká ò tàg sig ning, ma buká ò dinya sig ning, ma buká ning myàng ò sa sig. I wà Shìdun zyun-à ri sa tag pìkyinn má shi kwonn ma ning.

Bulus Sa Isoko

¹⁰ Mì ri fig àjwár wàni, mì ri sa Shinn Luyí ísoko barà ning ri dwim ya bi rag mì bu, ning ri zìm mì. N yì hing ning ri zìm mì, ama su ninonn nímá ning bàna ma pyù-à ná dwim ya bi mì bu.

¹¹ Mì ri dang fíg jir ashi bu bàna. Big tàg rìghing mì ò pànn samyib wà títi-à ò shi sig ma kàhi.

¹² N yì hing barà má shi shu ashi ma barà má shi shu áni wà ma shi sig ma bu ùwài. N yì hing barà má shi shu àjwár kó áni bidìm pár, kó ákaun tinn, kó ma shi sig ma buju, kó ma bàna ma buju, kó ma shi sig ma ùwài, kó ma shi sig ma títi.

¹³ N shi sig ma gbam-à Yesu Kristi ri ya mì. Má sa kó kai bidìm pár ma kàhi.

¹⁴ Ama sànn hing barà ning sa shang sig mì á shwìn-à mì ri wa.

¹⁵ Ning mpìrká á Filibi, ning yì hing sai-à ò rì dù dà fim Makidoniya, á sai-à ò rì dinya mpìrká jir àjwár-à níng, kó iklisiya nzyun sa shang fig mì bu bàna, sái ning, ning sa shang síg mì ò, ning ya sig mì bàì.

¹⁶ Sai-à ò shi sig á Tasalonika, wà ma ri zìm bu, ning ri dwim ya bi mì bu, í kàun nzyun bàna, ama kàun nìnnànn nímá.

¹⁷ Mì ri fig àjwár íri dò jir buká ning ri ya mì níng bàna, ama mì ri fig àjwár jir bará bá swàb kà ya ning á shinn wà ná dìg mà wai níng.

¹⁸ N zìg hing bàì ùwài nímá, hár màg rìghing mì, bàì-à ning dwim ya bi sig mì á vù Abafaroditas. Bu-à ning ya sig mì níng, shi sig àràg í bu twìb swànn á pyànn Shìdun ò, ku zìg hing, ku ri fig àjwár ma kàhi.

¹⁹ Shìdunmí, àsàin-à shi sig ma kó kai bidìm pàr, má ya ning bu-à ning ri zìm bidìm pàr á jir shinn Yesu Kristi.

²⁰ Shìdun Tayí aku shi bu-à mpìrká má swam yan hár kinn kinn. Aku shi àdòníng.

Nài Bib-à Wà Kinn Shinn

²¹ Anìng bib kà mpìrká tu kyàr sig pìkyinnbá, mì ri bir pìkyinnbá á byar Yesu Kristi. Wunzámí big, ká yì ma big shi síg zyun áyág níng, ri bib kà ning.

²² Mpìrká tu kyàr sig pìkyinn áyág níng, big bidìm pàr big ri bib kà ning, àràg mpìrká á lu kùr Kaisar ò bàna má.

²³ Asàn Shinn Luyí Yesu Kristi aku shi kwonn ma ning bidìm pàr.

Jibu
Jibu: Jir Shidun (New Testament)

copyright © 2019 Wycliffe Bible Translators, Inc.

Language: Jibu

Contributor: The Nigeria Bible Translation Trust

All rights reserved.

2025-05-06

PDF generated using Haiola and XeLaTeX on 5 May 2025 from source files
dated 6 May 2025

a1139895-fa13-5ff1-8c00-a8ad25fcfa2f